

В ПОНЕДЕЛЬНИК 2-Я СЕДМИЦЫ ВЕЧЕРА

во светильничное по предначинательном псалме, стихословим кафисму:

Ко Господу, вегда скорбети ми:

**На Господи возвах, поставим стихов 6: и поем стихиры подобны Триоди.
Творение господина Иосифа, глас 8.**

Подобен: Что вас наречем:

Кому уподобилася еси окаянная, / лентящая, о душе! / и не творящи добрая, / но любящи присно в злых пребывание? / Суд при дверех, покайся, / постом и молитвою очистися, / и Владыце твоему возопий: / согреших Ти, / прости яко Благоутробен, / и исправление мне даруй.

Имеяй благости пучину, / пучины моих грехов лукавыя изсуши Христе, / яко безгрешный Бог, и даждь сердцу моему умиление, / потоки беззакония отъемлющее: / да пою и славлю Твое благоутробие неизреченное, / долготерпеливе Благодетелю душ наших.

Ина стихира господина Феодора, глас тойже.

Подобен: Во Едеме рай:

Приведый и ныне нас Боже, / време общество всечестнаго поста совершити, / и даровавый нам во святое / поприще вторыя седмицы внити: / Сам сподоби Господи, / и к будущему благодетси, тело и душу нашу / и благодетельствуя и укрепляя: / яко да достигнем совершивше течение мужески, / в Господский день Воскресения Твоего, / вси в радости: / и да венцы носяще, / непрестанно Тя похвалим.

И Минеи 3. Слава, и ныне, Богородичен.

Прокимен, псалом 23, глас 1: Господь крепок и силен, Господь силен в брани.

Стих: Господня земля, и исполнение ея.

Бытия чтение. [Гл. 3, ст. 21 – 24. Гл. 4, ст. 1 – 7.]

Сотвори Господь Бог Адаму и жене его ризы кожаны, и облече их. И рече Бог: се Адам бысть яко един от Нас, еже разумети доброе и лукавое. и ныне да не когда прострет руку свою, и возмет от древа жизни, и снест, и жив будет во век. И изгна его Господь Бог из рая сладости, делати землю: от неяже взят бысть. И изрине Адама, и всели его прямо рая сладости: и пристави херувима, и пламенное оружие обрацаемое, хранити путь древа жизни. Адам же позна Еву жену свою, и зачещи роди Каина. и рече: стяжах человека Богом. И приложи родити брата его Авеля. и бысть Авель пастырь овец: Каин же бе делаяй землю. И бысть по днех принесе Каин от плодов земли жертву Богу: И Авель принесе и той от первородных овец своих, и от туков их: и призре Бог на Авеля и на дары его: На Каина же и на жертвы его не внят, и опечалися Каин зело, и испаде лице его. И рече Господь Бог Каину: вскую прискорбен был еси?

и вскую испаде лице твое? Еда аще право принесл еси, право же не разделил еси, не согрешил ли еси? умолкни: к тебе обращение его, и ты тем обладаеши.

Прокимен, псалом 24, глас 6: Призри на мя и помилуй мя.

Стих: К Тебе Господи, воздвигох душу мою.

Притчей чтение. [Гл. 3, ст. 34 – 35. Гл. 4, ст. 1 – 22.]

Господь гордым противится, смиренным же дает благодать. Славу премудрии наследят, нечестивии же вознесоша безчестие. Послушайте дети наказания отча, и внемлите разумети помышление. Дар бо благий дарую вам: моего закона не оставляйте. Сын бо бых и аз отцу послушливый, и любимый пред лицом матере: Иже глаголаша, и учиша мя: да утверждается наше слово в твоём сердце, храни заповеди, не забывай. Стяжи премудрость, стяжи разум: не забуди, ниже презри речения моих уст, ниже уклонися от глагол уст моих. Не остави ея, и имется тебе: возжелей ея, и соблюдет тя. Начало премудрости, стяжати премудрость, и во всем стяжании твоём стяжи разум. огради ю, и вознесет тя: почти ю, да тя обымет: Да даст главе твоей венец благодатей, венцем же сладости защитит тя. Слыши сыне, и приими моя словеса, и умножатся лета живота твоего, да ти будут мнози пути жития. Путем бо премудрости учу тя, наставляю же тебе на течения правая: Аще бо ходиши, не запнутся стопы твоя: аще ли течеши, не утрудишися. Имися моего наказания, не остави: но сохрани е себе жизнь твою: На пути нечестивых не иди, ниже возревнуй путем законопреступных. На немже аще месте воя соберут, не иди тамо: уклонися же от них, и измени. Не уснут бо, аще зла не сотворят: отымется сон от них, и не спят. Тии бо питаются пищею нечестия, вином же законопреступным упиваются. Путие же праведных подобне свету светятся: предходят, и просвещают, дондеже исправится день. Путие же нечестивых темни: не ведут, како претыкаются. Сыне, моим глаголом внимай, к моим же словесем прилагай ухо твое. Да не оскудеют ти источники твои, храни я в сердце твоём: Живот бо суть всем обретающим я, и всей плоти их исцеление.

На стиховне самогласен дне, глас 3. Дважды:

Духовным постом постимся, / расторгнем всякое развращение, / останемся же и соблазнов греха, / отпустим и братии долги, / да и нам оставятся прегрешения наша. / Тако бо возопити возможем: / да исправится молитва наша, / яко кадило пред Тобою Господи.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Духовным постом постимся, / расторгнем всякое развращение, / останемся же и соблазнов греха, / отпустим и братии долги, / да и нам оставятся прегрешения наша. / Тако бо возопити возможем: / да исправится молитва наша, / яко кадило пред Тобою Господи.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

Мученичен: Пророцы и апостоли Христовы, / и мученицы, научиша пети Троицу Единосущную, / и просветиша языки заблуждшия, / и общники ангелов сотвориша / сыны человеческия.

Слава, и ныне, Богородичен, глас тойже:

До конца убогих Твоих / не забуди Владычице: / но Твоими молитвами будущего нас свободы прещения, / и настоящего вреда, / и гнева Господня / исхити Богородице, Твоя рабы.

Ведомо же да есть: яко от сего понедельника вторья седмицы поста, выпеваются на Повечериях каноны, иже в Минеи, имущих прилучитися святых, от субботы Лазаревы до Недели Фомины, с каноны Богородичными. Прежде поется канон Богородицы, и по нем в Минеи. По 3-й песни кондак и седален в Минеи. а по 6-й песни седален Богородицы. Последи же канона стихиры в Минеи.

ВО ВТОРНИК 2-Я СЕДМИЦЫ, НА УТРЕНИ, ТРОИЧНЫ.

По 1-м стихословии седальны умилительныя Осмогласника, с Богородичны.

По 2-м же стихословии глаголем настоящия седальны, глас 8:

Подобен: Воскресл еси:

Страсти уздою непорочнаго поста удержавающе, / ум к честным Боговидением / верою совершеннейшею вперити вси потщимся: / яко да земную жития / сладость презрим, и небесную получим / жизнь и Божественное сияние.

Слава, тойже.

И ныне, Богородичен:

В пучину лютую впадох уныния, / от множества лукавых и беззаконных моих дел, / приидох в недоумение / и нечаянием ныне содержимь есмь. / Владычице Богородице, / Ты мя спаси, Ты помози: / грешников бо Ты еси умилоствление, / и очищение спасительное.

По 3-м стихословии седален, глас 8.

Подобен: Пастырская свирель:

Предложив тайную пост трапезу, / поущает нам богато насытитися: / ядим якоже брашно присноживотныя дары Духа: / пиим якоже питие, / слез струи боготочныя: / и возвеселившись, хвалу Богу / непрестанно принесем.

Слава, тойже.

И ныне, Богородичен:

От всякаго прещения, / и озлобления человеческого, / спаси нас Всесвятая Дево: / Тя бо имамы покров и предстательство / прибегающих к Тебе Богомати, / и к рожденному из Тебе Богу нашему: / Егоже моли избавитися нам от бед и скорбей.

Канон в Минеи и трипеснец господина Иосифа. И стихословится песнь Псалтира. Глас 8.

Песнь 2.

Ирмос: Видите видите, / яко Аз есмь Бог ваш, / прежде век рожденный от Отца, / и от Девы в последняя без мужа заченшийся, / и разрушивый грех праотца Адама, / яко Человеколюбец.

Воздохни, прослезися душе, обратися, покайся: приближися день, при дверех Судия, ко ответу готовися, и возопий: согреших Ти Щедрый, Милостиве, Благий, Ты мя ущедря.

Не сытость греха душе моя возненавиждь всегубительную, насладися сытостию поста прилежно, спасительныя заповеди снесь сотвори, наслаждение исходатайствующия вечных благ, верою.

Ангели, силы, начала, архангели, господства, престолы, власти, херувими и серафими, Благодавца и Бога молитесь, прощение долгов и страстей пременение даровати нам.

Богородичен: Едина рождающая безначальное Слово Всенепорочная, из Тебе воплощенного непреложного, еже бе, пребывавшая Деву по рождестве Безвестная, моли о всех, избавитися от тли жизни нашей.

Иный господина Феодора, глас тойже.

Ирмос: Видите, видите, / яко Аз есмь Бог ваш, / освятивый начаток вам приятен, / от дней всего лета одесятствование, / и сие дав людем Моим, / во избавление страстей, / во спасения начало.

Увидехом, познахом, яко благо нам в покаяние время, еже определил еси: но в сем приими Боже, молитвы наша, и исправи пред Тобою Щедре, яко кадило доброе, яко жертву приятную.

Ужасаюся и боюся, помышляя, елика согреших: како Тя усрящу? како явлюся Тебе страшне? како же предстану неумытному Твоему судищу? Темже пощади мя Щедре, в час, егда имаши судити всей земли.

Троицен: Пресовершенная Единице, Пребожественная, Триипостасная, нерожденне Отче, и Сыне Единородне, Душе от Отца исходяй, Сыном же являйся: Существо едино и Естество, господство, Царство, спаси всех нас.

Богородичен: Неизглаголанное чудо Твоего рождества, Мати Дево: како бо и раждаеши, и чиста еси в томже? како Отроча раждаеши, и не веси искуса мужеска отнюд? Якоже весть паче естества от мене новолепно, Слово Божие рождаеся.

Слава Тебе Боже наш, слава Тебе.

Ты ниневитяны покаявщихся и постивщихся, от запрещенного извел еси гнева: содомляны же огнем пожегл еси в пресыщении блудящия: но избави мя Христе, прещения их.

Ирмос: Видите, видите, / яко Аз есмь Бог ваш, / освятивый начаток вам приятен, / от дней всего лета одесятствование, / и сие дав людем Моим, / во избавление страстей, / во спасения начало.

Песнь 8.

Ирмос: Богоглаголивии отроцы:

Оправдавый воздохнувши мытаря, ущедривый блудницу от сердца слезившую, спаси ущедри Спасе, души поющих Тя.

Плодоносим деяния добродетельная постом Господеви, и вредных отдаляюща помышлений, да божественную сладость получим.

Ангельстии лица молят Тя, апостольстии собори, и мучеников чини, Иисусе, людем Твоим прощение даруй.

Богородичен: Несекомую гору Деву, светоносный свещник, благопреходную лествицу, Божие вместилище вернии ублажим.

Иный.

Ирмос: На горе святей прославльшася, / и в купине огнем Приснодевы / Моисеови тайну явльшаго, / Господа пойте, / и превозносите во вся веки.

В нарочитый день воздержания, приидите вси вострубим в песнях: и яко сладостию божественною учреждающася, песнями поим Господа, и превозносим во вся веки.

Кто снедает человека Божия древле? Зверь лев, от лести пророчи преслушания снеди приемша: блюди убо душе моя, да ты не прельстит чревобесия змий.

Благословим Отца, и Сына, и Святаго Духа, Господа.

Троицен: Яко Единицу Существом пою Тя, яко Троицу Лицы Тя чту, Отче, и Сыне, и Душе Пресвятый, безначальную державу Твоего Царствия славлю во веки.

Богородичен: Ты гора Божия явилася еси Богородице, в нюже Христос вселився, Божественныя храмы содела поющия: Господа пойте, и превозносите во вся веки.

Слава Тебе Боже наш, слава Тебе.

Пост яко хранителя чистоты и мать безстрастия почитающе, приидите людие от любви целуим, Господа поюще, и превозносяще во вся веки.

Хвалим, благословим, покланяемся Господеви:

Ирмос: На горе святей прославльшася, / и в купине огнем Приснодевы / Моисеови тайну явльшаго, / Господа пойте, / и превозносите во вся веки.

Песнь 9.

Ирмос: Проявленное на горе законоположнику / во огни и купине, / Рождество Приснодевы, / в наше верных спасение, / песнями немолчными величаем.

Добрый пост утучняющий сердце, клас зрелый добродетелей божественно прозябает: егоже возлюбим, во святых днех освящение приемлюще.

Во гресех многих осквернена, уязвена зря и осуждена, Милостиве, Твоею милостию ущедрив, спаси мя молитвами святых Твоих.

Увы всеокаянная душе, како отвещаеши? кий страх ты примет Судии сидящу, тьмам предстоящим ангелов? Потщися убо, прежде конца покайся.

Богородичен: Царскую колесницу, светлый облак, гору тучную, гору усыренную, браконейскуся молим Тя Дево, исцели страсти душ наших.

Иный.

Ирмос: Проявленное на горе законоположнику / во огни и купине, / Рождество Приснодевы, / в наше верных спасение, / песнями немолчными величаем.

Истинным постом постимся Господеви, яко брашен воздержася, языка, ярости, и лжи, и всякия иныя страсти очуждимся, да чисте Пасху узрим.

Ты Самуила процветил еси плод посте: ты воспитал еси Сампсона великаго храбра, ты совершаеши священники и пророки: ты нас освяти посте честный.

Слава, Троицен: Трисветлое Господи, Твоего единоначалия, светлыми сияньми во ум наш облистай от прелести многообразныя обратися нам к соединительному обожению.

Богородичен: Ты еси Богородице оружие наше, и стена, Ты еси заступление, к Тебе притекающих. Тя и ныне в молитву движем, да избавимся врагов наших.

Слава Тебе Боже наш, слава Тебе.

Имуще Духа Святаго, поста гостителя богата, Того дарований насытимся, и богато насладимся, Того воспевающе яко Бога нашего.

Ирмос: Проявленное на горе законоположнику / во огни и купине, / Рождество Приснодевы, / в наше верных спасение, / песнями немолчными величаем.

Светилен гласа.

На стиховне самогласен, глас 5:

Вскую унывающи душе моя, / греху работаеши? / и вскую немощна суци, / ко Врачу не притекаеши? / Се время благоприятное, / се спасения ныне день истинный: / востани, омый твое лице покаяния слезами, / и елеем благотворения свещу просвети: / яко да обрящеши очищение от Христа Бога, / и велию милость.

Стих: Исполнимся завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Вскую унывающи душе моя, / греху работаеши? / и вскую немощна суци, / ко Врачу не притекаеши? / Се время благоприятное, / се спасения ныне день истинный: / востани, омый твое лице покаяния слезами, / и елеем благотворения свещу просвети: / яко да обрящеши очищение от Христа Бога, / и велию милость.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Страстотерпцы Твои Господи, / чины ангельския подражавше, / яко безплотни, муки претерпеша, / единомысленное упование имуще обещанных благих наслаждение: / тех молитвами Христе Боже наш, / мир даруй миру Твоему, и душам нашим велию милость.

Слава, и ныне, Богородичен:

Блажим Тя Богородице Дево, / и славим Тя вернии по долгу, / град непоколебимый, / стену неборимую, / твердую предстательницу, / и прибежище душ наших.

НА 6-М ЧАСЕ ТРОПАРЬ ПРОРОЧЕСТВА, ГЛАС 6:

Достойно воспети Тя не можем, / но просим молящися: / не погуби нас со беззаконьми нашими, / благоприменителю Господи.

Прокимен, псалом 25, глас 4: Господи, возлюбих благолепие дому Твоего, и место селения славы Твоея.

Стих: Суди ми Господи, яко аз незлобою моею ходих.

Пророчества Исаиина чтение. [Глава 5, ст. 7 – 16.]

Также глаголет Господь: виноград Господа Саваофа дом Израилев есть, и человек Иудин, новый сад возлюбленный: ждах, да сотворит суд, сотвори же беззаконие и неправду, но вопль. Горе совокупающим дом к дому, и село к селу приближающим, да ближнему отымут что: еда вселитесь едины на земли? услышашася бо во ушесах Господа Саваофа сия: аще бо будут домове мнози, в запустение будут велиции и добрии, и не будут живущии в них. Идеже бо возорют десять супруг волов, сотворит корчаг един, и сеяй артавас шесть, сотворит меры три. Горе встающим заутра, и сикер гонящим, ждущим вечера: вино бо сожжет я. С гусльми бо и певницами, и тимпаны, и свирельми вино пият, на дела же Господня не взирают, и дел руку Его не помышляют. Убо пленени быша людие Мои, за еже не ведети им Господа, и множество бысть мертвых глада ради, и жажды водныя. И разшири ад душу свою, и разверзе уста своя, еже не престати: и снидут славнии, и велиции, и богатии, и губители их, и веселяйся в нем. И смирится человек, и обезчестится муж, и очи высокоглядающии смирятся. И вознесется Господь Саваоф в суде, и Бог Святыи прославится в правде.

Прокимен, псалом 26, глас 3: Господь просвещение мое, и Спаситель мой, кого убоюся?

Стих: Господь защититель живота моего, от кого утрашуся?